

Նախնիների հոգիների պաշտամունքից, որը ծագած պիտի լինի տոհմատիրական հասարակարգի կազմավորման սկզբներում, բխում է նաև Զանգեզուրի հայերի մեջ խորը տարածված այն հավատը, որ սբբերի՝ նահատակների, մարտիրոսների և կենդանի ժամանակ առաքինի կյանքով ապրածների հոգիները հովանավոր են հանդիսանում ոչ միայն իրենց հարազատների, այլ առհասարակ բոլոր մարդկանց¹⁰³ առողջության, հաջողության և բարեկեցության գործերին: Այդ զորությունն ունեն և նրանց գերեզմանները և բոլոր այն վայրերը, որտեղ նրանք ըստ ավանդության ապրել են կամ գործել: Այդ վայրերը վեր են ածվել խաչերի՝ ուխտատեղիների¹⁰⁴: Սովորաբար նրանց մասին պատմածների իրականությանը համապատասխան լինելը շատ կասկածելի է, օրինակ՝ Հին Գորիսում պաշտված Ճգնավօրի կամ Փիրթօւղանի կամ լեռների գագաթներին՝ ամփոփված սբբերի մասին պատմածները, որ միշտ ազոտ, շփոթ ավանդություններ են:

Այդ սբբերի հոգիներն, ըստ զանգեզուրցու հավատալիքի, կարծես սավանելիս լինեին որոշ վայրերի շուրջը, որտեղ առանձնապես ազդու էր նրանց զորավոր հովանավորությունը: Եթե նրանք որևէ պատճառով սրանից-նրանից վշտացած են եղել և պատժել են, ուղարկելով հիվանդություն, ճախորդություն, արտերի կամ այգիների անբերրիություն, անասունի ցավ կամ կոտորած, կարելի էր նրանց սիրաշահել, ջերմեռանդ աղաչանքներով, համբուրելով նրանց մասունքները, շոշափած իւերը կամ նրանց նվիրված պատկերներն ու խաչերը, վառած ճրագների լույսով նրանց լնւի մեջ պահելով և մատաղավ նրանց կերակրելով: Այդ սբբերից յուրաքանչյուրին նվիրված էին հատուկ օրեր-Ամեն մեկին ցույց էր տրվում համապատասխան եղանակով մեծարանք: Այդ պաշտամունքի անհատական բնույթը թույլ էր տալիս եզրակացնելու, որ այդ պաշտամունքը սկիզբ է առել այն պատմական աստիճանին, երբ որոշ անհատներ սկսել են համայնքի մեջ հատուկ դեր խաղալ և խոշոր հեղինակություն վայելել:

Շատ ավելի նախնական մտածողության հետքեր են պահպանվել շար ոգիների պաշտամունքի մեջ, որը հին Զանգեզուրում աշխարհըմբռնման մեջ, նույնպես և այլ հայաբնակ գավառներում, շատ լայն, կարելի է ասել՝ նույնիսկ գերադաս տեղ է բռնում և տեղափոխում է մեզ այն դարերը, երբ մարդս դեռ շատ էր ընկճված շրջակա բնության և մարդկային հասարակության ճընշման ներգործության տակ և նրա հոգեկան աշխարհի մեջ իշխում էր վախը: Այդ շար ոգիները Զանգեզուրում սովորաբար կոչվում էին Բաշկեր, հնարհներ: Նրանց չեն ուղղել աղոթքներ, որևէ մաղթանք, նրանք երբեք որևէ բարություն չէին անի մարդուն, նրանց օգնությանը մարդը երբեք չէր դիմում, այլ միայն միջոցներ էր ձեռք առնում նրանց շար միջամտությունից ազատ մնալու, նրանց՝ իրանից հեռու պահելու և նրանց պատճառած շարիքը վերացնելու համար: Նրանց վերաբերմամբ մարդու բռնած դիրքը նպատակ ունի ոչ թե այս կամ այն գործն անել տալը, այլ՝ ընդհակառակը՝ չանել տալը: Բացառիկ դեպքերում

¹⁰³ Նույնիսկ այլակրոնների:

¹⁰⁴ Այդ ուխտատեղիներից հայտնի էին Գորիսում Ճգնավօրի, Արծվանիկում՝ Կարմիր վանքի տակ եղած Ճգնավօրի, Ծաղկեձորի ս. Կակօփի՝ քարայրներում գտնվող, այնտեղ ապրող սբբերի գերեզմանները: